

欽定剿平粵匪方略

欽定剿平粵匪方略卷二十八 癸丑年

二月初五日

庚辰

安徽巡撫周天爵奏言逆匪自

破安省而後大隊由水陸蔽江東下直犯江南

省城至今文報不通萬分危急臣已飛咨琦善

陳金綬統兵迅速前赴江甯尙無信耗臣料江

甯一破揚鎮蘇常與清江一帶旣爲漕運咽喉

而山東兗沂兩府賊所必窺其途一出宿徐一

出邳郟均屬不可不防奏入

上命軍機大臣傳諭周天爵曰逆匪大隊已犯江南省城文報不通該省關繫東南全局豈可稍有疏虞北來之兵必須調往江甯應援著速撥前往不可遲誤安徽前調山東兵尙有未到者卽催調前赴揚州各口布置該撫亦不得概行截留

上又命軍機大臣傳諭祥厚福珠洪阿霍隆武文藝楊

以增楊殿邦楊文定曰逆匪大隊直犯江南省城文報不通所有城內布置機宜與竊聽諸法須嚴密防備不可稍涉疏忽至揚州鎮江一水可達難保該逆不分股滋擾著該漕督巡撫等於江面趕緊設法堵禦鹽販及糧船水手皆可招爲我用豐工遣散人夫並著楊以增留心防範勿令爲賊所誘

上又命軍機大臣傳諭向榮曰逆匪已犯江甯至今文

報不通危在旦夕著向榮卽日迅速馳赴江甯若稍  
緩須臾恐該省城大兵單不能堅守一有疏失東南  
大局關繫匪細賊船蟻聚江干利用火攻該大臣旣  
有船隻著卽設計施行不可坐失機會本日又催令  
陳金綬先往救援該大臣到後與該提督合力攻擊  
倖逆匪知外援已至有所顧忌牽制庶不至以全力  
攻城而省圍可解務卽先儘所有之船督兵由水路

疾駛往救至陸路各兵跟接前進不可以等候船隻  
再事遷延江甯安危繫於該大臣此行朕急盼捷音  
無負委任

上又命軍機大臣傳諭琦善陳金綬曰現在賊匪已至  
江甯該省城大兵單望援甚急陳金綬接奉此旨著  
卽星速南馳渡江援救惟所帶官兵僅四千名仍恐  
不敷調遣著琦善再撥給精兵四五千派員管帶兼

程馳赴江南交陳金綬調度琦善卽督率現帶官兵  
前進一面飛催吉林黑龍江馬隊扼要防守江北浦  
口一帶爲陳金綬接應賊船蟻聚江干利用火攻該  
大臣所帶火箭卽設計施行

上又命軍機大臣傳諭李鴻章曰逆匪已犯江南省城危  
急山東兗沂兩府賊所必窺著該撫卽行出省迅赴  
各該處確探賊蹤分飭文武各員扼要嚴防切勿稍

有疏虞其濱臨黃河各處渡口仍著會商東南河督嚴密稽查勿使奸匪闖入

同日呂賢基奏言皖省辦理防剿及團練事宜正當喫緊之時需才孔亟臣查給事中袁甲三素有膽識辦事勇往廣東潮州遺缺知府趙昀才具開展又籍隸安徽熟悉情形可否

飭令前赴安徽軍營隨臣幫辦一切事宜奏入

上諭內閣曰給事中袁甲三廣東潮州府遺缺知府趙  
昀均著前赴安徽幫同呂賢基辦理團練防剿事宜

初六日辛巳祥厚陸建瀛福珠洪阿霍隆武奏言

賊勢猖獗益甚本月二十八日膽敢分水陸兩  
路直犯江甯省城臣祥厚臣陸建瀛等立即登  
陴督防二十九日黎明陸路一股先到攻打南  
城聚寶門又分擾水西旱西儀鳳太平洪武通

濟等門槍礮橫施自朝至夕狂悖不可名狀我  
兵旗綠各營數不滿萬幸皆誓死固守擊斃逆  
匪約千餘名始行退下詎三十日該逆水路一  
股衝突而至太平儀鳳兩處勢更危迫查江南  
旗綠各營兵祇此數前調山東兵二千名旣無  
到信向榮琦善等亦無赴江的耗不奉

恩旨速催恐金陵危在旦夕奏入

上諭曰江南勢甚危急該署督等嬰城固守多守一日  
可待援兵速到合力攻擊朕惟有仰額

昊天拯救萬人莫赦一人之罪譴也

上命軍機大臣傳諭向榮楊殿邦楊以增楊文定文藝  
曰賊船偏近江甯所有瓜州京口東壩及下游一帶  
均關緊要大江以北及黃河南北兩岸亦應豫爲籌  
防著楊殿邦楊文定文藝楊以增各就地方情形嚴

密籌防並著隨時知照向榮合力夾擊以期互爲聲援賊船林立江面最利焚燒著該大臣等體察籌辦上又命軍機大臣傳諭怡良黃宗漢曰現在賊偏江甯城大兵單急待援應著怡良黃宗漢飛飭提督葉紹春總兵陳世忠卽統帶水師鎮將挑選精壯兵丁駛駕戰船由福山口進兵迅赴上游迎擊以資救援怡良距浙省尙遠黃宗漢接奉此旨卽行就近飛調勿

得往返札商致稽時日

初七日壬午楊文定奏言賊匪東下梁山失險業

經直徧江甯城下臣擬在常州駐紮該府距江甯鎮江東壩等處均不過一百餘里及二百餘里不等地居適中卽在該府設立糧臺以便三處轉相應付至奏調山東官兵二千名准咨先後起程赴甯竊恐到省參差賊匪橫梗其間無

從收集隨咨行山東撫臣並沿途帶兵各官於  
行抵鎮江取齊俟有千人然後整隊派往至各  
城備防兵力本形單弱而蘇常兩府直是城守  
空虛無兵可恃賊若分股竄入水陸隨處可通  
危急情形不堪言狀相應請

旨飭下浙江撫臣就近揀調精兵二千名迅速前來臣  
將以一千名留蘇備防以一千名駐紮常州以

爲護送江甯鎮江等處糧餉之用擬俟山東浙江援師稍集臣卽自行統帶進剿以冀得解江甯之圍並求

皇上速飭向榮琦善暨陳金綬限以時日趕到江甯庶可迅掃妖氛早奏蕩平之績奏入

上命軍機大臣傳諭楊文定曰賊匪現犯江甯楊文定擬在常州駐紮設立糧臺適中轉運惟鎮江爲蘇省

門戶而東壩直達蘇州皆爲緊要該撫務須分派重兵小心防守毋任賊匪闖入所謂浙江精兵二千著卽飛催來蘇幫同剿捕江甯待援甚急該撫亦知以勦爲防若援兵旣集蘇常一帶布置已妥該撫卽帶兵前進以解江省之圍更爲妥善

上又命軍機大臣傳諭琦善陳金綬曰賊隊直犯江南省城文報不通亟望援兵琦善統領重兵假以事權

原期督催諸將迅速應援爲朕稍釋南顧之憂乃明知羸馱不敷不肯用夫解運藉詞遷延並陳金綬亦牽制不進以致安慶失守貽誤事機今江甯望援甚急若再不能如期應援設有疏失江南半壁又遭荼炭該大臣等自問當得何罪陳金綬著星速渡江直抵江甯以救危急沿江船隻豈不能設法購覓卽木簞亦可從上游浮渡若全不豫籌又以無船藉口安

用爾大帥爲耶琦善統帶大兵著卽兼程前往爲陳  
金綬接應毋得再有遲誤陳金綬抵江甯時如向榮  
大兵已到卽著會同合力夾擊不惟立解省城之圍  
並可殄除賊氛以慰朕念

初八日 癸未 周天爵奏言逆匪竄入長江連破楚

皖省城直犯江甯如入無人之境其故賊踞上游  
水陸並進蔽江而下我兵以下游當之無不

立破此形勢之一誤也論戰之法陸路用車馬  
水路用舟楫洞庭長江上下木簞船隻俱爲賊  
有聚泊漢口多時匪徒號稱數十萬持滿而發  
而我兵總計不過數萬即使聚集一處全力迎  
擊已難制勝乃自黃州以下至金陵沿江千餘  
里要隘數十處更無木簞戰艦但以陸路弁兵  
分守各要隘或千餘名或數百名零星散布如

同兒戲一旦大隊賊來如風掃葉此機宜之一  
誤也臣竊觀我

朝自用兵以來未有味形勢失機宜如今日一誤  
再誤之甚者現在賊犯江甯絕我運道阻我鹽  
關一切清米課銀數千百萬舉而盡資盜糧臣  
又竊謂不昧形勢不失機宜未有如今日逆賊  
之甚者蓋京師倉儲庫項官俸兵糧仰食江南

者十之八九儻江省再失賊必畫江而守以彼  
強富之徒犯我空虛之境賊勢紛竄南北靡定  
不可不統籌全局豫爲防剿之計也亟請

特簡親信重臣統帶大兵由中路進取一面檄調廣東  
水師義勇前後兩路夾攻會剿一面團練山江  
皖豫四省連疆勁勇保護黃河各隘口遏賊北  
竄之路臣與呂賢基等統帶兵勇左右其間以

滅逆醜而彰

天威惟安徽巡撫任重事繁日不暇給加以收集散兵  
安撫人心在在均關緊要臣年衰朽承辦江北  
防剿事宜吏治兵機勢難兼顧應請

旨簡派明幹大員獨任其事俾臣得專責成所有團練  
事宜臣已遵前

旨行知四省附近連疆各地方官認真辦理

周天爵又奏言臣竊卽安徽全局計之惟廬州形勢據巢湖上游與正陽巨鎮相爲犄角居重馭輕應請遷省於此將安慶改作府城駐紮總兵一員以資水陸防禦伏祈

聖裁正繕摺間適接候補知府牛鎮等稟稱賊匪於十九日擾及池州府城卽於是夜失守該逆等搶掠後於二十二日上船二十三日全行退出各

等語臣當飛札總兵王鵬飛將截留舒城之山東官兵一千二百名帶赴省城相機辦理並於攔江磯上游擇要防守遏其歸路旋又報江浦驛文報不通江甯被圍危在旦夕亟請

飭下山東撫臣李德迅赴曹州劉家口一帶彈壓北路以防教匪伺釁而動臣與呂賢基等一面迅卽團練招募並截留各路官兵以防北竄宿徐一

帶奏八

上命軍機大臣傳諭周天爵曰現在江甯危急該署撫會同呂賢基辦理團練事宜自未能赴江南接應惟淮徐一帶亦關緊要所有江北防堵該署撫卽督同地方官認真妥辦務使各郡互相保衛毋令奸匪潛蹤池州府失守該城文武並該藩司等下落一併確查具奏另奏廬州形勢較安慶扼要請遷省城等語

俟李嘉端到任後察看情形會同妥議具奏

上諭內閣曰周天爵著仍以兵部侍郎銜辦理防剿事務安徽巡撫著李嘉端補授未到任以前仍著周天爵暫行署理

初九日甲申直隸提督陳金綬候補四品京堂勝

保奏言臣等奉

命馳往安徽截剿逆匪先經會同琦善挑選直隸精兵

四千名於正月十九日自信陽起程因楚境山路狹窄難行又遇陰雨路滑每日晝夜趲程不及百里現在已過蘄水縣境距安徽省城僅五百餘里路漸平坦臣等極力分督前後各隊官兵迅速兼程察探逆匪所向併力追剿不敢稍事遷延其在後吉林黑龍江馬隊未據報抵何處應由琦善統帶接應如有需用隨時飛調

勝保又奏言此次安徽進剿之兵四千名除防守營盤衛護糧臺外出戰精銳不過二千餘名率皆未經戰陣恐難深恃臣日與在營諸將弁及各營兵丁講求陣法激勵士氣以誠意相感使上下不致睽隔該兵丁等亦深知

天恩高厚願切同仇臣愚以爲兵貴精不貴多陳金綬攻打前敵不能兼顧後路臣卽督兵在後策應

將弁有不用命向前者以軍法從事臨時相度  
地勢或分兵抄截以蹙賊勢或據要設伏以挫  
賊鋒再加乘隙施放火箭以衝賊陣如前敵獲  
勝可以乘勢追殺如或衆寡不敵未能得手尙  
可首尾相顧不致大挫期保萬全陳金綬久歷  
戎行惟見其年逾七旬於行軍紀律駕馭人才  
之方未能十分周顧仰懇

皇上密飭該提督詳慎商推謀定後戰攻其所必救備其所必攻以操勝算似於大事有濟奏入

上命軍機大臣傳諭琦善陳金綬勝保曰現在江甯危急陳金綬勝保卽著星速馳赴江甯與向榮合力援應前諭琦善添撥官兵四五千名一併前往江南交該提督調度此項兵丁如尙未到著卽迅速迎提務令兼程東下以資攻剿琦善究在何處若旣繞道行

走又復沿途耽閣是直欲以無賊之區爲藏身之固  
豈大臣公忠爲國之心乎琦善所帶之兵除撥出外  
尙復不少昨已諭令駐紮江北浦口一帶爲陳金綬  
接應並著陳金綬勝保飛催前進該提督久歷戎行  
於一切用兵之法自必悉合機宜仍與勝保和衷商  
推計出萬全

上又命軍機大臣傳諭舒興阿張祥河曰現在江甯需

兵甚急所有陝西綠營官兵一千名並甘州陝安官兵七百餘員名卽飭副將錫普常阿都司永恰布等管帶迅赴向榮軍營候撥其西安滿兵一千名卽飭副都統常春等帶領馳往陳金綬軍營聽候調遣並著飭令星速前進毋稍延緩

初十日酉乙祥厚陸建瀛福珠洪阿霍隆武奏言

賊匪日益猖獗現在極力防守疊次殲斃多名

無如抵死抗拒毫無畏忌現仍盤踞城外天后宮靜海寺等處藉爲藏身之固總緣江甯城大兵單未能分兵出勦雖士卒敢戰紳民同仇終無以痛掃賊氛且該逆詭計不測遲之又久更恐別出變端惟有仰懇

迅飭山東撫臣將楊文定請調之兗沂曹等處兵丁二千名並向榮琦善陳金綬等兵速赴江南以解

重圍而資合勦奏入

上命軍機大臣傳諭祥厚福珠洪阿霍隆武曰逆匪水陸並進攻打各城並盤踞城外天后宮靜海寺等處前已疊次諭令向榮帶兵東下並諭琦善陳金綬等統帶北路勁旅馳赴江甯與向榮合力援應並令李德將前調兗沂曹等處兵丁二千名兼程前赴金陵矣該大臣等務當督率在城紳民兵勇竭力固守以

待外援俟大兵雲集內外夾攻必可解圍賊匪詭計  
百出總宜嚴防奸細以杜內應

同日兵部侍郎銜署安徽巡撫周天爵奏言江  
甯爲東南最要省會大局攸關所有任事諸臣  
豈可置江南於不顧向榮琦善陳金綬但報起  
程之期不問行抵之處臣當遣人密查一面加  
緊迎催臣自行抵宿城以來民心稍定而山江

皖豫四省連疆跨河南北匪徒如蝟而起業經  
通飭四省團練鄉勇安撫難民嚴誅匪類臣又  
反覆籌思得一處處設防家家能戰之法倣宋  
時之撒星陣而於前明戚繼光之空心礮臺擴  
而充之遂親赴宿州試辦苟以是推行各府州  
縣將無處非守亦無處非伏更無處不是勁兵  
布置聯絡千有餘里皆鐵壁銅城矣奏入

上命軍機大臣傳諭周天爵曰據奏處處設防家家能戰固屬善策惟千有餘里鞭長莫及一時何能措辦該署撫先就皖省實力整頓認真團練俾人人俱成勁旅一俟大兵到齊卽當馳抵江甯會同截擊方爲不負委任至官兵過皖俱備金陵之用萬不可任意截留吉順統兵三千名已抵皖城著卽飛催渡江援應江甯萬勿遲誤此外如有續到官兵亦卽飭赴江

甯應援不可遲緩

同日楊殿邦奏言賊匪竄至江甯省垣城門已  
閉文報不能出入瓜儀偏近金陵賊若由龍潭  
渡江而北距儀徵僅三四十里該處江口散漫  
無紀處處皆可登陸一經闌入則水陸無險可  
恃情形危急萬分臣現雖飛派兵勇赴瓜州儀  
徵各江口扼要防禦惟瓜儀水陸要隘共計二

十餘處賊蹤已近兵力甚單委員團練之糧船水手及雇募之划船水摸等勇雖已陸續應募到營合計尙不足二百名實難濟事惟有仰懇

天恩飛飭浙江福建山東各撫臣暨江南提臣福山鎮

臣迅將臣奏調水陸官兵卽日兼程馳抵瓜儀

分段派防以資捍禦抑臣更有請者議防之難

甚於議戰臣擬俟所調水陸各兵到齊擇其精

銳者親加訓練督率將弁激勵士卒由長江溯  
流迎擊以解江甯之圍陸路則令幹練鎮將統  
領精兵至儀徵六合天長等處扼險駐紮以防  
分竄

楊殿邦又奏言坐補兩淮運使臣但明倫在兩  
淮最久於瓜揚情形極爲熟悉與臣籌及揚州  
城垣低薄人心浮動斷難議守現經分防布置

兵力單弱尤爲可慮臣思自來用兵必有後援  
武昌九江均以無援坐困致令失守今江甯被  
困數日並無救兵危急情形不堪設想臣俟所  
調各兵雲集統領弁兵溯流迎擊爲江甯之援  
揚州爲南北咽喉淮徐門戶並請

皇上速調勁兵簡派提鎮大員統領迅速馳赴淮城清  
江分駐爲揚州之援節節設防庶爲嚴密奏入

上命軍機大臣傳諭楊殿邦曰現在山東已無可調之兵所有北方勁旅皆在琦善軍營疊經降旨命陳金綬帶兵援救江甯琦善駐紮江北浦口一帶以爲後應如琦善兵到卽與儀徵揚州等處地方毗連正可互爲聲援至該漕督請俟所調各兵到齊後親往上游援應江甯籌辦尙合機宜該漕督起程後可令但明倫督帶存兵擇要扼守並卽於所調鎮將中留一

二員以爲後應目前江甯喫重不得不先其所急難以分兵駐紮淮城該漕督業經募勇添船以壯聲勢著卽嚴密防堵毋致疏虞

楊殿邦又奏言再逆匪現竄江甯瓜儀水陸各要隘固須多撥兵勇嚴密堵禦尤須鎮將大員督率管帶方無疏虞茲查有崇明鎮總兵葉常春署徐州鎮總兵聶金鏞金山營遊擊鄭乾熟

悉軍務勇幹知方合無仰懇

天恩准調來營客臣派委督防以資禦侮奏入得  
旨允行

同日李德奏言臣前請據河扼守之議仰蒙

俞允茲東省已將各渡口船隻歸併劉家口董家口二  
處不准別口私渡又另派弁兵駐紮會同印委  
各員嚴加盤詰務求周密其曹單迤西沿河尙

有直隸地面亦應一律照辦庶天險可憑事半功倍查黃河自潼關以東至河南府其南北兩岸俱屬山巒鼎峙水溜湍急地勢最險難以偷渡惟北岸自孟縣南岸自鞏縣汜水以至江南之雲梯關數千里平疇輿衍環抱縈流間有橫互土山不甚高峻或數十里而止臣昔年曾周歷其地雖各處船隻寥寥急宜嚴防偷渡仍應

由各省督撫責成地方文武各將所轄地段節節認真嚴防復於熱鬧馬頭密派幹員稽查如此同心協力無隙可乘逆匪卽屬猖狂安能斷流飛渡奏入

上命軍機大臣傳諭誦爾經額楊以增福濟楊文定陸應穀曰據李德奏已將各渡口船隻歸併劉家口董家口二處不准別口私渡又另派弁兵駐紮會同印

委各員嚴密盤詰等語逆匪竄入安慶現又竄出肆  
擾難民逃徙愈多恐奸細潛跡冀圖偷渡黃河潛行  
窺探江蘇淮徐兩府屬濱河地方十分喫緊黃河南  
北兩岸自河南孟縣鞏縣汜水以下地多平曠防範  
尤應周密其山東曹單兩縣迤西沿河尙有直隸地  
面亦須一體設防著訥爾經額楊以增福濟楊文定  
陸應穀督飭所屬廳營州縣各按所管地段認真稽

查嚴防偷渡並遴派妥員隨同巡緝遇有緊急將船隻收入北岸勿任奸匪潛越至各處渡口必歸併一  
二大渡盤查始覺嚴密著該督撫等體察情形迅速  
籌辦

十一日  
丙戌周天爵奏言臣適接到徐州遊擊馮

景尼稟稱正月二十九日馳抵浦口不能渡江  
二月初三日辰刻突有賊匪數千四路夾攻該

遊擊帶領兵勇分投迎敵馬上義勇衝殺數十人斬取首級六顆兵勇奪獲大黃旗一面槍械多件自辰至戌砍死轟斃計賊二百餘人馬勇直衝追剿而逆賊復聚萬餘四路輪流來攻賊船陸續增進火藥鉛子俱已用盡繼以短兵相接兵勇致有傷亡勢難抵敵祇得收隊退回臣查馮景尼所帶之勇內有馬上義勇三四十人

此次衝陣殺賊頗資得力應請

飭下旗營多派馬隊以備衝擊山東官兵報到一千三百六十四名臣緣江甯危急先撥頭起五百四十名迅赴江甯應援二起五百名隨後啟行其未到之兵臣當飛咨迎催改道赴揚州各口布置防守並未截留奏入報

開

十三日戊子陳金綬勝保奏言臣等於初六日入

安徽宿松縣境卽於是夜抵太湖縣據該處防堵委員等稟稱賊匪於正月十七日由水路竄至安慶省城夜間被賊轟開城門因而失守該匪卽於次日乘船東下已到東西梁山地方等情伏思安慶省有防兵數千不意賊到逾時卽已失守臣等雖連日極力趲程前進竟致救援

不及曷勝憤恨查東西梁山近江甯太湖縣  
距江甯對岸之江浦縣以小路捷徑覈計尙有  
七百餘里當卽咨會向榮一面飛札沿途州縣  
並派委幹練將弁分投查探賊蹤一面督帶官  
兵無分雨夜星馳直赴江浦一帶迎剿截擊臨  
時審度何處緊要相機會剿奏入

上諭曰汝等止能在江北截擊不克渡江如有船隻仍

應赴江南救援爲是

同日陸應穀奏言襄陽土匪擒獲多名首夥逃散現在南陽地方安靜惟逆賊竄陷安慶歸德一帶情形喫緊臣現將宛郡應辦事宜布置完竣卽日馳赴歸德相機籌辦奏入

上命軍機大臣傳諭陸應穀曰現在逆匪竄擾江甯如安徽鳳潁江南徐州等處均與歸德接壤陸應穀卽

馳往該郡相機籌防尤宜嚴拏奸細勿令賊匪漏跡

十四日己丑祥厚陸建瀛福珠洪阿霍隆武奏言

江甯爲省會重地南北咽喉逆賊旣過湖南卽垂涎此地稍有挫失則由揚州而至清江渡河由鎮江而擾江蘇過浙江四通八達情形不堪設想臣等與前廣西巡撫鄒鳴鶴激勵旗綠各營晝夜嚴防並募本城勇壯一萬餘人協同守

禦兵民一心已歷十日擊斃逆匪亦不下二三千人而援兵不至驛路梗塞向榮琦善陳金綬等均無赴援信息卽撫臣奏調之山東兗沂曹兵二千名亦無入境文報奏入

上命軍機大臣傳諭祥厚福珠洪阿霍隆武曰逆匪圍撲省城該大臣等激勵旗綠各營晝夜嚴防並募本城勇壯一萬餘人協同守禦已歷十日並擊斃逆匪

不下二三千人足見兵民一心布置嚴密向榮統帶  
大兵已有船隻諒已順流駛下陳金綬亦於二月初  
八日行抵安徽太湖縣各路精兵計日均可趕到該  
大臣等務當督同在事文武兵勇紳民竭力固守俟  
大兵雲集即可內外夾攻殲茲醜類逆情詭譎務須  
隨時嚴查奸細以杜內應卽援兵到後仍宜加意嚴  
防不可稍形鬆懈

上又命軍機大臣傳諭向榮陳金綬曰賊圍江甯十日  
向榮陳金綬何以至今尙未趕到向榮所調湖南船  
礮江西船隻早經應手若順流東駛不過旬日卽可  
直達金陵該大臣現在行抵何處未據奏報殊不可  
解陳金綬前日報到於本月初八日始抵太湖距江  
省尙遠何以濡滯若此著卽星速帶兵前往應援

十六日 辛卯 楊殿邦奏言瓜儀爲北路門戶較之

鎮江東壩尤爲喫重且山東官兵自北至南必先經瓜州而後抵鎮江自應就近截留派赴瓜儀一帶防剿其安徽所謂未到官兵係從常鎮行走應由撫臣就近留派東壩鎮江守禦如此酌量截撥庶兵力可期早集惟山東官兵聞有從河南安徽一帶徑赴江甯者現在江浦縣城聞已失守浦口被賊搶占道路梗阻東省官兵

萬不能由該處渡江前進臣已飛咨河南安徽撫臣查明前項官兵無論行抵何處卽令飛速繞至揚州以資防剿至臣所募之各處壯勇及糧船水手雖已集有八百餘名然均未經行陣必須久練而後可用今剋期招募倉猝湊成器械未齊訓練未精祇能藉壯聲勢防範土匪以之打仗禦賊恐難得力刻下江甯省城被賊圍

困專望大兵救援而六合江口已有賊船該縣  
請兵請餉告急頻仍臣雖調撥廣艇及京口舟  
師給予重賞派員督令駛至儀徵上游相機進  
剿竊恐賊衆我寡未能濟事且儀徵瓜州水陸  
要隘數十處現到之兵及揚州存城官兵不及  
千名分防各隘口勢甚單薄設或賊匪分路竄  
至則瓜揚危急情形不堪設想惟有懇

恩飭催山東福建等省官兵迅速馳抵瓜儀以資抵禦  
現在江甯城門關閉多日文報不通一切軍需  
刻不可緩前此運庫籌撥銀十萬兩用已過半  
現雖百般撙節亦僅足支旬餘頃接探報向榮  
大兵將次繞至六合上游臣已飭總局備銀一  
萬兩委員解赴儀徵以上接濟支用存銀實已  
無多且浦口爲賊竄踞江路梗塞各路大兵業

經撫臣楊文定咨照由六合儀徵而至瓜州取  
齊會合進剿雇備船隻及一切支應所需更屬  
不貲卽臣所調防守兵勇亦指日可以到齊需  
用餉糈不得不豫爲籌備合無仰懇

天恩飭部在於附近各省藩關等庫籌撥銀五六十萬  
兩迅解揚州以濟急需奏入

上命軍機大臣傳諭楊殿邦曰逆匪圍困江甯援兵尙

未趕到瓜儀一帶爲北路門戶必應竭力守禦所有  
前調山東福建等省官兵已有旨催令星速前進惟  
山東官兵自北至南必先經瓜州後抵鎮江著卽就  
近截留派赴瓜儀一帶防剿其安徽未到官兵由常  
鎮行走派赴東壩鎮江防守布置尙爲妥協現在江  
浦失守浦口被賊搶占東省官兵恐有梗阻著卽飛  
咨皖豫各巡撫查明官兵行抵何處卽令飛速繞道

馳赴揚州毋令中途阻滯官兵陸續到齊復有所募壯勇及糧船水手八百餘名藉壯聲勢著楊殿邦督同但明倫等竭力籌畫晝夜嚴防遏賊北竄之路斷不可稍有疏虞至六合江口賊船經該清督調撥廣艇及京口舟師派員進勦諒可及早翦除不至占踞江口江甯危急向榮將次繞至六合上游距省已不甚遠陳金綬亦計日可到合力進勦當可解省垣之

圍瓜揚爲南北咽喉該漕督仍當督飭嚴防毋稍鬆懈

上諭內閣曰楊殿邦奏軍需緊要請速籌撥近省餉銀一摺著戶部速議具奏

同日陸應穀奏言軍需經費支絀待用孔殷前留減平銀十萬兩官員捐輸銀十一萬餘兩上年防堵業已陸續支用無存卽部撥銀七十萬

兩除製造軍裝一切並解信陽州糧臺南陽光  
州防堵支應外省局現僅存銀十餘萬兩加以  
現奉指留銀十四萬六千餘兩共止二十餘萬  
兩刻下琦善陳金綬帶兵分路進剿所有糧餉  
等項若不先時請撥安能如期濟運卽本省留  
防馬兵支應採辦製造亦皆刻不容緩合無仰  
懇

皇上天恩俯准飭部於鄰近省分撥銀一百萬兩兼程解豫以濟急需如用有餘賸仍卽儘數解部斷不敢以軍需專款留作別用奏入得

旨戶部速議具奏旋經戶部議奏該撫所請百萬之數未免過多擬將奏撥部庫之山西春撥地丁等銀二十萬兩並在河南春撥應報地丁等款內撥銀十萬兩共銀三十萬兩解交該撫酌量分

給

上從之